

扶寧金氏科宦錄序

金氏籍扶寧者系自羅室忠勲德業炳烺麗史簪組相襲以至國朝為東方華胄焉後裔國煥嘗蒐輯先世科榜為一卷今弘梓億述二人又錄蔭宦者為一冊籤曰扶寧金氏科宦錄將讎棗梨而傳諸世使龜述甫介而問余序乃取而閱之擢龍虎榜者殆百人中司馬試者過百人而補蔭職者至不可僂指計何其盛歟噫科宦為屈伸大闕然是存乎命焉非人力所可致也故古之君子必自修其德行以盡在我之道而榮枯休戚一任於天此所謂守分安命者也世級漸降知命者鮮莫不歆豔富貴決性命爭強弱而奔走乎形勢之途浮沉乎得失之海未得

之也憂其未得既得之也恐其失之及其時移事往金紫鍾鼎
屬之邯鄲一枕無跡可尋惟知命之君子雖窮居草野不求聞
達而其嘉言善行良法美規山斗乎當年日星乎後祀然則其
所屈者暫而所伸者久矣今此錄則不然科宦之外以德行俎
豆之者為二十有一人其盛果如是矣扶寧氏之世其家者曷
嘗在於擢高科登顯仕而已哉詩曰毋念爾祖聿修厥德吾為
之一誦云

丙子孟秋安東金甯漢序

扶寧金氏科宦錄序

科宦錄者吾扶寧氏文獻也其書則述而不作其例則列而傳之猗歟敬順王不忍使無辜之民肝腦塗地之德太子公當與忠臣義士背城一戰之義文貞公之道德文章斥佛扶儒忠宣公之功存社稷裨益斯文少尹公郡事公少監公保勝郎將公志存國僕之節慶流子孫宗支相承南蔭筮仕洽滿五百員生進文武一百九十餘員嗚呼功存宗祊澤被生靈者代不乏書而記錄浩大散在各家顧難湊合成書實是吾金之欠事日私梓億述炯鍊煖亨伯喆博考廣採草成二冊而顧今天地翻覆滄桑可慮圖所久傳將為棗梨請余以弁嗚呼非忠無君非孝

無親非悌無長聖遠教弛民不興行亂賊接踵禍國累家者此
此焉詩凶而春秋作聖人亦何心哉其時則然矣吾知是書之
行必有曠感而興起者矣惟願讀是書者以虛靈本善之心奉
純粹至善之性恐恐乎有或有違兢兢乎有或有越使先祖當
日之義不替於今與後則此雖吾金一家之史不無有補於風
化之萬一云爾

丙子元月上泮郡事公十六代孫洛奎謹序

扶寧金氏司馬文科錄序

國初設 殿試及鄉科所以取士也而命有司隨擢而圻之臚
名而唱之謂之榜也其制蓋古矣周用三年大比之灋漢有對
策明經之舉而唐而宋杏園二百之綴行瓊林聞喜之宴使鳴
當時國家之盛賁歸治世之像我 列聖祖右文之治接殷周
而軼漢唐鴻天也匠碩輔之才溯三英而併濂洛猗歟天畀我一治
之運惟吾氏金系出扶寧中炳于麗文翰鱗赫圭組蟬聯為世
所獎而我鼻祖文貞公諱址文章為當世之冠冕道德為斯門
之標準勲業載千古之彝常功施社稷澤被生民宜有子孫享
幾百世無窮之餘蔭矣逮夫 李朝麗益蕃衍一源四派自

太世迄于 憲哲四百有七十餘年之間涵育成就重襲世德
大闡為幾小成為幾大小俱成亦幾而大而為公卿大夫小而
為令長丞郎有衛斯道在有殉節義在有砥名行在頻幸先聲
之不墜是為全省之推詡矣若而子孫稍久替零從或播散之
嶠之湖者亦不勝樓紅白安 寶之教旨生進錄目之編冊家
藏巾衍之間燹于龍鼠飢于蛇犬見存者無幾後吾之子孫雖
欲撫往蹟而攷其牒烏可得也年代從以愈闊事實由以益漫
則吾宗十數世修立之道未免乎文獻無徵之歎言念及此安
得不慨然而寒心也哉余襄相日尋神氣漸耗雖有志於斯而
未能就焉惟諸宗中能幹是事者意或有之恭俟有年矣果今

日瀛之南族人國煥甫袖示一錄卽吾門先後世大小科榜目也蒐出於各派家藏中所存攷取於李朝科榜中所載輯成一編文科爲二十八員生員爲四十四員進士爲五十一員大小科俱中亦十二員兄弟聯榜亦十一員而本外祖來歷之備盡年譜先後之昭詳若指諸掌吾宗十數世暨祖若孫維宗與支文章德行簪纓勲業煥然復明於今而其目不繁而簡似略而詳萬枝同根百川同源物本乎天人本乎祖而一冊之中遂成同堂之會吾祖之靈知必有喜而亦必曰國煥真吾肖孫也推以算之後來宗族中大闡亦不知爲幾人生進亦不知爲幾人也今日國煥之志抑亦爲貽後無窮之計也而吾門大小之

科亦將為繼世無窮之慶矣其中有四祖未詳錄者亦為一二云向所謂中或播散之禱之湖科榜則考取於 歷史而來歷則無稽於家牒故也更俟日後宗族中博涉強記之人俾遂其國煥未盡就之志也國煥即郡事公派文科侍直公諱懷慎之十三世孫生員四友堂公諱禹祥之十世孫也余才素鹵莽粗事舉業弱冠有五猥亦荷 臨軒之擢匪分之悚已極因涯而紹先之志常愧廢違國煥今以此屬余并記故不以蕪拙辭為喜而諾者幸吾門之履歷有備而嘉其幹先之志克勤也

崇禎紀元後五丁卯八月日通訓大夫前行司諫院正言養默

謹記

扶寧金氏司馬文科錄跋

弗類好觀家牒故事自少性然也惟我金氏以新羅敬順王雲
仍始顯于麗朝自尚書公諱景修至提學公諱龍壽歷踐世科
掌握銓衡樹之家聲者豈獨使竇桂王槐專其美哉此槩見於
麗史選舉之篇而不得其詳吁其恨也逮夫本朝聖神作興
扶植儒道休養英才之方駕唐虞軼殷周而復見一元文明之
期會也噫環扶風百里之鄉德星聚精文章才德之士並世輩
出升諸司馬文科者或以表策或以經學或以詞賦或以贊柑
濟濟乎間躡玉署蹌蹌乎歷踐宰列為國家之器用其於盛朝
造士之典豈曰少補哉顧此吾宗諸族譜不大同蓮桂之科目

頗未詳悉識者病之弗類留神十數年一依國朝榜目裒集成
帙以附割刷而節義之炳烺誠孝之卓異道學之淵源文章之
璨瓘並未顯錄以圖壽傳後之觀此書如把明鏡靡不洞照也
昔者石潭李先生撰先銘有曰扶安維金累善積功秩秩家法
顯顯清譽觀此先正君子之一言登科諸公之清譽可徵於今
百世之上矣嗚呼來茲百世勿替引之克擅科聲繩厥家法永
保終譽余拱手以俟焉

侍直公後裔國煥謹識

湖右之扶寧故慕齋金先生所稱君子鄉也吾金之貫此鄉而
布灌列邑圭組相承者蓋由科宦之不絕迄 本朝右文崇儒

之世顯我中祖侍直公諱懷慎始闡科聲而篤慶旁流暨于宗
支諸派捷其蓮桂之榜者迄今爲百餘員夥數猗歟盛哉忠孝
學行文章遺逸之賢于子蹌蹌並萃榜眼而最其蔚者喜安之
甕井帶方之木洞則泱泱乎知其有君子之風也顧此司馬文
科之榜錄殆不遑於先人之世而始出於今日之鋟梓事若有
待而然耶此等文字取重於來世者不害爲隋珠昆山之比也
嗚呼讀是書者孰無述家風憬世德之意我族叔國煥氏實有
功於吾門也夫茲敢不勝欽慕撰次數語付于卷末

澹溪公六世孫洛獻謹書

扶寧金氏科官錄跋

語曰學而優則仕余惟優於學其賢者也賢者必仕古之道也後世之設科取士雖與古之賓興禮聘不同然優於學者非此無以進於行道之位故士皆就而求進然則由科致位者其亦後世學優之賢也夫於是乎語人之賢必以是語世德高下亦以是多少者理勢然也吾金科甲之盛國中罕此者輿論所誦而道德文章忠孝名節多出其中則又有冰汎稱學優之賢而已者宗英弘梓億述因宗老國煥氏所編大小科榜錄增加後時而不及錄者既又添以武科之案外此而逸學薦職南蔭筮仕并與合編而成二冊總名之曰扶寧金氏科官錄凡諸位之

嘉言懿行生卒始終皆就此詳記俾觀者一覽瞭然其於宗事可謂勤矣嗚呼是舉也豈爲誇耀先德於今日世變之後哉但欲使宗族後進觀祖先樹立之卓言行之正其賢皆由學而成而知所從事也千秋道之常勉學天不忘荀子有言然則舍曰後世取士之法亦安知學優之賢終不見賓興禮聘之古道於來許耶勛哉覽是錄者

丙子元月上澣直長公十四代孫永喆謹書

竊以爲人家文字非學究天人行滿宇宙功存繼開澤被生靈則雖充棟汗牛盈箱溢紙何足有無於重輕哉今此科宦錄乃吾全金一千年史而一開卷而吾金祖先之嘉言懿蹟如指諸

掌蓋其規模簡而詳悉約而不煩雖使夫夫讀之亦皆融會貫通矣爲吾金而讀是書者不徒爲紙上之空言如承顏面如聞教誨以之體之身而驗諸行使祖宗當日之義不替於今與後則先祖之靈必莞爾而笑曰余有後矣然則諸君之功不其大乎編集者誰也弘梓億述炯直也

丙子元月中澣承旨公十三代孫洛觀謹書

惟吾金之赫赫在新羅載在國統尚矣勿論一自太子公八皆骨山麻衣草坐以終子孫數代隱德不仕矣至諱景修公文科吏部尚書自後繼承非尚書平章事則大提學大司馬此豈冰累代隱逸之驗乎入本朝五百年雖欠大拜及從享之位生

進文武宰列方伯舍人校理守令郎官不下數百員嗚呼盛矣
而年代久遠雖以先祖之子孫或昧於先祖之履歷者多是故
外人或有問之者舉皆矇然不知是豈爲人子孫之道乎故距
今七十年前丁卯侍直公十三代孫諱國煥編集扶安金氏司
馬文科錄而持平公十二代孫正言公諱養默序之庶可以闡
先祖之未遑而一新世人之耳目矣印出未多存者幾希實爲
吾金之慨嘆久矣日族親私梓億述炯鍊就其中補未備添陰
仕一編名曰扶安金氏科宦錄將印出廣布欲家藏而戶戶之
乃謂余曰此是吾宗中大事則族丈亦不可無一言余聞而起
敬曰顧此綱紀數喪父不父子不子者此此相望爲吾金者各

備此編置之凡案朝夕觀感詳悉先祖之履歷模襲先祖之言
行克念克敬動靜無違諸君之功豈淺淺乎我此雖一家氏族
之記實亦不無有補於風教云爾

丙子元月 日司直公十三代孫洛冕謹識

嘗病夫世之學者捨近而取遠棄本而惟末之是尚嗚呼有能
詳說太古三代事而及至本朝史少須臾自沮左瞻右顧語無
倫次若到自家直傍係仕宦與美蹟尤矇然不知是豈獨諸人
之過也再去丁卯年雖有吾金司馬文科錄之刊行然不無踈
略處且欠蔭仕篇雖有學醇德備若冰以大小科則不錄欲簡
易抄出吾金蔭仕中有美蹟者煥如日星而有志未遂者殆將

數年矣日弘梓億述炯鍊示以一部書奉而讀之乃吾全金科
宦錄而注之行蹟儘吾金不可無之良史也惟願為吾金者先
詳吾金之先蹟思歆效則次及於本國史以至於外國則庶免
捨近取遠棄本尚末之譏矣

柔兆困敦恭月上元持平公後裔演述謹書

惟我金氏同貫扶寧自扶寧府院君以至止浦先生文貞公諱
坵后先蔭明德相承或功存國乘勳錄或享在士林俎豆各譜
其祖先祖節義道學文章科目顯秩殆近幾百星霜而尚未諧
藏帙蒙豈非吾宗之欠事耶使各派諸子孫各言先祖實行事
業則一曰然一曰不知豈不痛嘆哉嗚呼况今世道否塞倫綱

類紀之日殫心義講并藏百世實是祖德之深厚可徵而孫謨
之承述可篤於斯可則矣豈不謂盛意也哉然舉多令人隨其
華變憑先利已平淡父祖加借迷行誣構無徵是何謂人道耶
昭昭善行侃侃嘉言素著刊布使各子孫宜置文獻一部於案
上出入常目上所謂祖德益白孫謨益修不與世風俱違母至
辱先累祖千萬持守則今日雖一家之私而實有裨於世教之
萬一也歟尸其事炯直伯喆俾余為跋又感追遠不敢以蕪辭
固辭茲以數行謹跋惟願僉族濯雪齊心磨玉旋力以完大事
之經始如此云爾

丙子元月望日承旨公十五代孫炯國謹拜跋

東國非曰無史人自不讀矣然則所讀者何也卽中國之史而已噫我東自檀君言之四千年史自吾金始祖大王言之二千年史自太子公言之一千年史也其曰四千年全朝鮮萬姓統一之史其曰二千年新羅姓金始祖之史其曰一千年卽扶安吾金算傳之史也至於算傳之史惟我先祖校理公察訪公長水公印行於前通德郎公諱東灝草成於後實為吾金之前後太史也以後各史其派各藏其家落落難合假使合一卷秩浩大讀者不無望洋之歎族叔弘梓億述族弟炯鍊日常聚首求其簡易易讀之道就其中有學行文章節義事業功名者梳而精而草為二局蓋其一局獨善齋族丈諱國煥已為刊更加添

刪其一局卽新纂而止於庚戌其麟筆之大史也歟噫我東之人不讀東史而喜讀中國史係是前賢所戒也顧今後惟我老少諸族熟讀我史及於人之史而國而至於中國之史則其於先後本末之序不失尺寸而祖先之事實瞭然在心目之間云爾

歲在丙子元月 日侍直公後裔炯淇謹書

國而可無史乎家而可無傳乎國有史而其政之得失可得而詳家有傳而其族之盛衰可因而知惟吾扶寧之金出自敬順王太子而至文貞先祖以道德文章扶正斥邪為麗朝名賢照耀史冊矣一自少尹先祖與第三人志存罔僕大歸貫鄉子姓

克承雖或出仕戒進恬退世傳忠孝多出道學節義而載在各
家譜記錄又浩大有能詳說者蓋鮮矣實爲吾金之痛恨久矣
何幸弘粹億述兩賢宗有志於斯廣考於先世遺蹟博採於儒
賢文集編成吾金科宦錄二局南蔭筮仕生進文武摠七百餘
員矣一開卷而直傍先系科宦與懿蹟瞭然於朗中而敦睦之
風亦可藹然而生矣竊有感於兩賢宗之克勤先事敢賀一言
而付尾云爾

丙子二月上浣從仕郎公十三代孫銓燮謹述

夫逸民之清閒達人之顯榮歷代固有而今我得姓於東土之
後發於新羅榮於麗朝繼于漢陽有初克終者比他無愧矣自

我先祖文貞公尤顯於世伊後旁祖雲江之科宦海翁之勲節
又爲湖邦之聞族焉大抵吾金八派中出處顯晦不可勝紀而
惟我少監公派一枝落在他鄉榮貴文華縱未及於當時大家
而微官末品從來十餘世代不乏絕焉譜牒之承緒來歷雖有
載錄科宦之詳細榜目猶未備悉故槩刊于冊使後雲仍得無
文獻不足之歎云爾

丙子二月上澣少監公十七代孫表勲院參奉勛植謹跋